

Watu Wote Wanavutwa kwa Mwokozi Aliyeinuliwa Juu

Nami nikiinuliwa juu ya nchi, nitawavuta wote kwangu—Yohana 12:32.

Kamwe hakujawahi kuwa na uelewa mkuu wa Yesu kama ilivyokuwa pale alipoangikwa juu msalabani. Aliinuliwa juu ya nchi, ili awavute wote Kwake. Katika mioyo ya wengi ambao walishuhudia tukio lile la kuangikwa na kusikia maneno ya Yesu, kulikuwa na nuru ya ukweli iking'aa. Wangeweza kutangaza pamoja na Yohana hivi, "Tazama Mwana-Kondoo wa Mungu, aichukuaye dhambi ya ulimwengu." Kulikuwa na wale ambao hawakutulia mpaka, walipoyachunguza Maandiko na kulinganisha kifungu kwa kifungu na kuona maana ya utume wa Yesu. Waliona kwamba msamaha wa bure ulitolewa na Yeye ambaye wema wa rehema Yake uliukumbatia ulimwengu mzima. Walisoma unabii uliohusiana na Yesu na ahadi za bure na kamilifu, zikielekeza kwenye chemchemi iliyowekwa wazi kwa ajili ya Yuda na Yerusalemu.

Kafara ya Yesu kama fidia ya Mungu kwa ajili ya dhambi ni ukweli mkuu ambao kweli zote hushikamana. Ili kuweza kueleweka na kupokelewa vyema, kila ukweli katika Neno la Mungu, kutoka Mwanzo hadi Ufunuo, unapaswa kusomwa katika nuru itiririkayo kutoka kwenye msalaba wa Kalwari na katika uhusiano na ukweli mkuu wa ajabu wa upatanisho wa Mwokozi. Wale wanaojifunza juu ya kafara ya pekee ya Mkombozi wanakua katika neema na maarifa.

Ninawasilisha mbele yenu kumbukumbu kuu ya rehema na wongofu, wokovu na ukombozi—Mwana wa Mungu aliyeinuliwa juu kwenye msalaba wa Kalwari. Hii inapaswa kuwa mada ya kila hotuba.

Yesu anaalika na kuvuta kwa Roho Wake Mtakatifu mioyo ya vijana na wazee Kwake.... Pale Kristo aliyesulubiwa anapohubiriwa, nguvu ya injili inadhihirishwa kwa mvuto inaouweka juu ya aaminiye. Katika mahali pa kubaki kuwa mfu katika makosa na dhambi, anaamshwa.

Mwinue juu Mtu wa Kalwari juu na juu zaidi; kuna nguvu katika kumwinua Yesu Kristo aliyeangikwa pale Kalwari.